

ВОРМЫ АСТЭ АЧИД

# Пеймытысь потон

Кызы туала технологиос инвалидъёслы юртто

Ангелина СНИГИРЁВА

**Котькуд нунал  
Ижысь Дмитрий Дру-  
жинин пуныеныз чюш  
чукна уж дураз дыр-  
тэ. 4 пыдо эшез сьёры  
жог, сзэь вамышъя.  
Вөзтйз ортчись адя-  
ми валатэк но кылёз,  
та воргорон мукетъ-  
ёсызлэсь маин ке  
висъяське шуыса.**

## Сьод вишты

Дмитрий - сукур. Егит воргоронез пумитай корка дораз ик, уж дураз мынон сяменыз со вань улэм-вылэмзэ мадиз. Дмитрийлэн улонез 29 аресозяз мукет адымиослэсь өз висъяськылы. Школазэ йылпумъямез бере Ижысь училищеын дышетскиз, токарь-фрезеровщик луиз, заводын ужаз, пöртэм производствосын тыршиз, таксист но вал.

- 29 арескам, 2012-тй арын, мон шöдтэк шорысь сукур кыли, - вера воргорон. - Огпол эшъясьным город сьöры ыбылйськыны потймы. Мишене учкисько, нош син азым кыче ке сьод пичи вишты кылдйз, кырмышъяй-кырмышъяй, но өз быры. Берло со бадзымгес но бадзымгес луиз. Кышкатски, больницаостй ветлыны кутски, Москваысь клиникаосы көня ке пол вуылй, но толыкез өз луыни. Нырысь-валысь валамон ой вал, мар бордысь таچه югдур кылдйз. Берлогинэ, трос пумо эскеронъёс бере, тодмо луиз: син пушкам воспаление кутскем. Соку мон мебель лэсьтонъя огаз предприятиян тыршисько вал, предприятиямы урод материалъёс вуиллям, чапак со токсичной суретъёсын мон ужаськем, ачим та сярис берло гинэ валай ини.

Туж бадзым куректон вал аслым но, семьяелы но. Таچه дыръя куд-огез, семьязылы вормонтэм ныпъет луизы шуыса, сукур луэмзы бере юскисько, асьсэдыз асьсэос быдто. Соку мон кышнояськемын вал ини. Бадзым тау кузпалылы, со монэн артэ вал, сюзэмме буйгатйз, жечезлы оскон пычатйз. Та секыт вакытэ ик семьяны шумпотон ивор вуиз - кузпалы нуны возьма вылэм. Табере нылпимылы 7 арес ни, 1-тй классэ ветлэ.

## Ныль пыдо эш - Москваысь

- Виль улонлы мар ке бордысен дышыны кутсконо вал. Нырысь-валысь пукси компьютер сьöры, кызы



Тускутяз Ангелина СНИГИРЁВА

**Ижысь Д. Дружининлы ульча кузя ветлыны юрттэ Ида пуныез.**

сукур мурт соин ужаны быгатоз шуыса. Бöрысь тодй: сукуръёс асьсэлы юрттйсь - пуны - кутыны быгато. Пичи дыръям пуные вал, соин мынам но ныль пыдо эше луоз шуыса, юн оски. Россиясь сукур адымиослы пуныосты дасянъя школае ветлй, со Москва улосын интыяськемын. Та школа пыр трос пумо пуныос пото, но поводырьлы 5 процентэз сяна уг яра.

Мон туж шумпотйсько, ми Идаен (пунылэн нимыз - **авт.**) ог-огмес шедьтйм шуыса. Со мынам эше но, синъёсы но. Со туж лякыт сямо, визьмо, кылзйськись.

Сукур адымилы пуны дунтэк висъяське ке но, ваньмыз сое асьсэлы басытны уг быгато. Нырысь ик, ачиз адыми дась луыны кулэ пуныен улыны. Угось со утялтэмез, саклыккес кулэ каре, юмшаны гинэ соин нуналаз көня ке пол потано, миськоно, сузяно, ветеринар доры нуллоно. Мон юромом лыдъяса потй: пуныез возыны арскын ог 60 сюрс манет кошке. Зэм, государство та коньдон пöлысь

көнязэ ке берыктэ, но уноз аслад кисысьсытд ик поттоно. Собере, пуны сёто таза лулсэръёсын 18 ареслэсь бадзымъёслы гинэ, вöзаз улысь адымиос пумит öвöл, улон интыез пöйшурен улыны тупамон ке.

Ида пуные Удмуртиын нырысетйез поводырь вал. Калыкмы дышеммын ой на вал пуныен ветлйсь сукур адымиослы. Соин нырысь-валысь автобусын, трамвайын кондукторъёс потыны косылйзы яке пуны понна уксё курылйзы, лавкаосы но пырыны чемысь уг лэзё вал. Сöсыр адымиос сярис тросгес мед тодозы, соослы тросгес саклык мед висъялозы шуыса, сукуръёслэн библиотекаязы ужаны лыктэме бере кондукторъёсын пумиськонъёс радъяллям, сукуръёслэн правоосы сярис вераським. Озы али кондукторъёсын валамтэос öвöл ни. Али Ижын 4 пыдо юрттйсьёсы көня ке муртлэн кылдйзы ини.

Идаен ми артэ 4 ар пала ини, со мынэсьтым улонме трос поллы капчигес кариз, шуыны луоз. Соин чюш мон уж дорозам 10 минут купсын вуисько, бодыен мынысал 40 минут. Тани, ужаны мыныкум, УдГУ дорысь стоянка пыр ортчисько, Идае ой луысал ке, мон бодыен вань машинаосты шуккылыса-чабъяса быдтысал, дыр, соос угось отын кызы сюрес пуктылэммын. Но куддыръя мыным огнам кытчы ке мыноно луэ. Кылярысь, концерт кылзыны, эшъясьным мунчое - таяз учыре сукуръёслы чаклам нимысьтыз аудионавигатор юрттэ. Со вера, кытын тубатъёс, кытын сюрес вамен пыдын выжон инты, кытын кыче магазин вань. Светофоръёс сярис ке... Куд-огез куараен верало, ку сюрес вамен выжыны яра, но котыкытын тазы лэсьтэммын öвöл на. Горд яке вож буёл жуа, уг вера навигатор но. Соку вöзам сылйсь адымиосты юрттыны курысько. Но чемысь малы ке асьме калык кышкатске, номыр вератэк, дыртыса вöзтйм ортче. Но соку но югдурис потыны луонлык вань - онлайн волонтеръёс. Соослы телефонэн нимысьтыз программа пыр жингыртыны луэ, озы кытысь ке дуннелэн мукет пумысьтыз жуч кылэз валас адыми видеосвязь пыр мынам синъёсы луэ.

## Улонэ поттэ компьютер

Адыми сукур луэ ке, со көм пушказ ватйськыса улэ шуыса малпано öвöл. Со озы ик ураме потэ, эшъясьнызы пумиське, ужа. Дмитрий 2015-тй арын лыктйз Сукуръёслэн но ляб адзисъёслэн элькун библиотекаязы, татын выль эшъёс шедьтйз. Отчы ветлйсь егитъёс асьсэлэсь клубзэс кылдытйзы. Көня ке ар талэсь азыло грант угйзы но палаткаос, спальникъёс басытйзы. Табере араз 4 пол инкуазе потало, чорыгало, шутэтско.

Вылезлы жог дышетскыны быгатэмзэ но мукетъёслы юрттыны бадзым мылкыдзэ адзыса, Д. Дружининэз öтйзы библиотекаяе ужаны. Озы егит воргорон татчы ветлйсь адымиосты компьютерен вырыны, сукуръёслы тупась программаосын ужаны дышетыны кутскиз. Нялтас тодон-валан люказ Удмурт кун университетын, туэ библиотекарьлэн удысэзъя диплом басытйз.

- Таза адымилы телефонэн жингыртыны номыр шугез öвöл ук, - азылантэ Дмитрий. - Нош синтэмъёс сое но лэсьтыны курадзо. Тани ми доры вазиськиз вал одйгез анай, нылпиезлы юрттыны курыса. Кыче шумпотйз сукур нылаш, нырысьсэ ачиз анаезлы жингыртыны пöрмытйз шуыса. Озы туала техникаез кутыса, ми но улонлэсь бере ум кылыське, озы ик Интернетэ пырыськом, мар дуннеын, Россиян луэ, тодйськом.

Дмитрий монэнэм но эксперимент лэсьтйз: синъёсме маскаен ворсаны курыса, компьютер сьöры пуктйз. «Привет» ке но печатла, шуиз. Уж дурын компьютер сьöрын быдэс нуналъёсын пукисько, текстъёсме жог печатласько кад. Нош таяз учыре воксё жудй: клавиатураысь кыче буквалэн кытын интыяськемез сярис вунэти. Ярам, Дмитрийлэн юрттэмезъя букваосты шедьтй, озы ке но одйг кыл но гожтыны ой быгаты. Нош сукуръёс, пе, 8 занятие купсын быдэс клавиатураез умой дышето, бöрысь текстъёс асьсэос гожъяны пöрмыто ни.

Алигес Дмитрий вуылйз Нижний Новгородысь сукуръёслы улонин юрттонъя центре. Отын «Универсальный мобильный помощник» программа тодон-валан люказ. Табере пиосмурт Удмуртиысь сукур нылпиослы но бадзымъёслы туала программаосын ужаны юрттоз. Та проектэ пырыськем адымиос пöлысь устоез вуоно арын мыноз Москвае, быгатонлыккэ «Словом и жестом» конкурсын возьматоз. Вераны кулэ, Дмитрий - шаерысьтымы нырысетйез сукуръёсты дышетйсь-тренер.

- Та программа чотын тросгес саклык висъялом сукур нылпиослы. Угось анай-атайёслэн нылпиосынызы ялан пукыны, книга лыдзыны дырзы уг окмы. Собере, али ваньмыз учебникъёс но Брайль шрифтан (сукуръёслы юромом лэсьтэм шрифт - **авт.**) гожтэмын öвöл ук. Нош та нылпиослэн но улонин асьсэдыз шедьтэмзы, кыче ке удысья дышеткемзы потэ. Тани тодмоосы пöлын массажистэ, юристэ дышеткемъёс вань. Нош смартфонэн текстъёсты но лыдзыны, адымиосын но кусып возыны, урамъестй ветлыны, книга кылзыны луэ. \*\*\*